



HADIS 40

OBJEKTIF KURSUS KESELURUHAN:

- a) **Memahami konsep Hadis 40:** Peserta akan memperoleh pemahaman mengenai Hadis 40 termasuk sejarah penyusunan, latar belakang pengarangnya serta peranan Hadis 40 dalam tradisi hadis Islam.
- b) **Mengenalinya hadis-hadis utama dalam agama Islam:** Peserta akan mengenali dan mempelajari teks-teks Hadis 40 yang paling terkenal, memahami konteks dan makna setiap hadis serta aplikasinya dalam kehidupan seharian.
- c) **Menghayati pengajaran Hadis 40:** Peserta akan mengkaji dan memahami pengajaran moral, etika dan hukum yang terkandung dalam Hadis 40 serta implikasinya terhadap amalan hidup.
- d) **Mengaplikasikan hadis dalam kehidupan:** Peserta akan mempelajari cara-cara untuk mengaplikasikan pengajaran Hadis 40 dalam kehidupan peribadi, keluarga dan masyarakat serta mengintegrasikan nilai-nilai hadis dalam tindakan sehari-hari.
- e) **Menilai kepentingan Hadis 40 dalam agama Islam:** Peserta akan menilai kepentingan Hadis 40 dalam memahami syariat Islam secara menyeluruh serta peranannya dalam memperkukuh iman dan amalan dalam masyarakat Muslim.

HADIS KELAPAN: KEHORMATAN SEORANG MUSLIM

عَنِ بْنِ عُمَرَ رَضِيَ اللَّهُ عَنْهُمَا أَنَّ رَسُولَ اللَّهِ صَلَّى اللَّهُ عَلَيْهِ وَسَلَّمَ قَالَ:

Diriwayatkan daripada Ibnu Umar r.huma, sesungguhnya Rasulullah SAW bersabda:

أُمِرْتُ أَنْ أَقَاتِلَ النَّاسَ حَتَّى يَشْهَدُوا أَنْ لَا إِلَهَ إِلَّا اللَّهُ، وَأَنَّ مُحَمَّدًا رَسُولُ اللَّهِ، وَيُقِيمُوا
الصَّلَاةَ، وَيُؤْتُوا الزَّكَاةَ. فَإِذَا فَعَلُوا ذَلِكَ، عَصَمُوا مِنِّي دِمَاءَهُمْ وَأَمْوَالَهُمْ، إِلَّا بِحَقِّ
الْإِسْلَامِ، وَحِسَابُهُمْ عَلَى اللَّهِ تَعَالَى.

“Aku diperintahkan untuk memerangi manusia sehingga mereka bersaksi bahawa tidak ada tuhan melainkan Allah dan bahawa Muhammad ialah utusan Allah, mendirikan solat dan menunaikan zakat. Apabila mereka telah melakukan perkara tersebut, darah dan harta mereka terpelihara daripadaku melainkan dengan hak Islam, dan perhitungan sebenar mereka diserahkan kepada Allah SWT.”

رَوَاهُ الْبُخَارِيُّ وَمُسْلِمٌ.

Hadis ini diriwayatkan oleh al-Bukhari dan Muslim.

Antara pelajaran dan pelaksanaan inti pati hadis dalam kehidupan yang boleh diambil ialah:

1. Tugas para pendakwah adalah menyampaikan risalah daripada Allah SWT sebagaimana yang dilaksanakan oleh Rasulullah SAW.
2. Hadis ini sama sekali tidak menyeru kepada perbuatan menyerang kaum atau agama lain yang tidak melakukan kezaliman atau serangan terhadap kaum Muslimin. Islam agama yang membawa kesejahteraan dan keamanan sejagat sebagaimana jelas dalam prinsip Islam tiada paksaan dalam beragama.
3. Manusia yang diperintahkan untuk diperangi dalam hadis ini hanyalah kelompok yang menolak segala jalan perdamaian dengan melakukan permusuhan melampau. Peperangan hanya dilancarkan terhadap kelompok yang memerangi, mencabuli perjanjian dan menzalimi orang lain. Begitulah sebagaimana perkataan yang merujuk kepada kata akar **قَاتَلَ** dalam hadis ini bermaksud peperangan yang terjadi kerana tindak balas antara dua pihak. Keputusan untuk berperang juga ditentukan oleh pemerintah bukannya keputusan secara individu.
4. Penilaian terhadap manusia dibuat di dunia ini berdasarkan secara zahir. Oleh itu, Rasulullah SAW mengaitkan keselamatan darah dan harta mereka berdasarkan ucapan syahadah, solat dan zakat.
5. Hadis ini menunjukkan kewajipan memelihara nyawa manusia. Hukuman mati oleh pemerintah hanya dibenarkan jika seseorang itu melakukan perbuatan yang menuntut dijatuhkan hukuman seperti itu seperti membunuh orang.

SENARAI RUJUKAN PENTING

1. Al-Arba'un al-Nawawiyyah cetakan Dar al-Minhaj.
2. Al-Kafi dan Tatmim al-Kafi: Syarah Hadis 40: Dr. Zulkifli Mohamad al-Bakri.
3. Syarah Hadis 40 Al-Nawawiyyah: Zulhimi Mohamed Nor, Mohd Yusuf Ismail, Amiruddin Mohd Sobali dan Ahmad Sanusi Azmi.
4. Syarah Hadis 40 Imam Ibnu al-Aththar: Terjemahan dan Huraian Dr. Mohd Solleh bin Ab. Razak.
5. 40 Hadis Imam Nawawi: Sebuah Huraian untuk Dunia Semasa: Ali Jum'ah: Terjemahan Lajnah Penterjemahan APT.
6. Modul Penghayatan Hadis 40 Imam Nawawi: Kementerian Pendidikan Malaysia.
7. Al-Wafi fi Syarh al-Arba'in Al-Nawawiyyah: Dr. Mustafa al-Bugha.
8. Jami' al-'Ulum wa al-Hikam: Ibn Rajab al-Hanbali.